


竹書紀年卷上

國家圖書館 NATIONAL CENTRAL LIBRARY, TAIWAN, R.O.C.

梁沈約註
明范欽訂
河東趙標刊

黃帝軒轅氏

母曰附寶見大電繞北斗樞星光照郊野感而孕二十五月而生帝於壽丘弱而能言龍顏有聖德劾百神朝而使之應龍攻蚩尤戰



竹書紀年 卷上
虎豹熊羆四獸之力以女魃止淫雨天下既定聖德光被羣瑞畢臻有屈軼之草生於庭佞人入朝則草指之是以佞人不敢進

元年帝即位居有熊○初制冕服

二十年景雲見以雲紀官

有景雲之瑞赤方氣與青方氣相連赤方中有兩星青方中有一星凡三星皆黃色以天清明時見於攝提名曰景星帝黃服齋於中

宮坐於玄扈洛水之上有鳳凰集不食生蟲不復生草或止帝之東園或巢於阿閣或鳴於庭其雉自歌其雌自舞麒麟在囿神鳥來儀有大鸞如羊大蛇如虹帝以土氣勝遂以土德王

五十年秋七月庚申鳳鳥至帝祭於洛水

庚申天霧三日三夜晝昏帝問天老力牧容成曰於公何如天老曰臣聞之國安其主好

文則鳳凰居之國亂其主好武則鳳凰去之
今鳳凰翔於東郊而樂之其鳴音中夷則與
天相副以是觀之天有嚴教以賜帝帝勿犯
也召史卜之龜焦史曰臣不能占也其問之
聖人帝曰已問天老力牧容成矣史北面再
拜曰龜不遠聖智故焦霧旣降游於洛水之
上見大魚殺五牲以醮之天乃甚雨七日七
夜魚流於海得圖書焉龍圖出河龜書出洛

赤文篆字以授軒轅接萬神於明庭今塞門
谷口是也

五十九年貫胥氏來賓○長股氏來賓

七十七年昌意降居若水產帝乾荒

一百年地裂○帝陟

帝王之崩皆曰陟書稱新陟王謂新崩也帝
以土德王應地裂而陟塋群臣有左徹者感
思帝德取衣冠几杖而廟饗之諸侯大夫歲

時朝焉

帝摯少昊氏

約按帝摯少昊氏母曰女節見星如虹下流
華渚既而夢接意感生少昊登帝位有鳳凰
之瑞或曰名清不居帝位帥鳥師居西方以
鳥紀官

帝顓頊高陽氏

母曰女樞見瑤光之星貫月如虹感已於幽

房之宮生顓頊於蒼水首戴干戈有聖德生
十年而佐少昊氏二十而登帝位

元年帝即位居濮

十三年初作曆象

二十一年作承雲之樂

三十年帝產伯鯨居天穆之陽

七十八年帝陟○術噐作亂辛侯滅之

帝嚳高辛氏

生而駢齒有聖德初封辛侯代高陽氏王天下使鼓人拊鞀鼓擊鐘磬鳳凰鼓翼而舞元年帝即位居亳

十六年帝使重帥師滅有鄆

四十五年帝錫唐侯命

六十二年帝陟

帝子摯立九年而廢

帝堯陶唐氏

母曰慶都生於維之野常有黃雲覆其上及長觀於三河常有龍隨之一旦龍負圖而至其文要曰亦受天祐眉八彩鬚髮長七尺二寸面銳上豐下足履翼宿既而陰風四合赤龍感之孕十四月而生堯於丹陵其狀如圖及長身長十尺有聖德封於唐夢攀天而上高辛氏衆天下歸之

元年丙子帝即位居冀○命羲和曆象

五年初巡狩四岳

七年有麟

十二年初治兵

十六年渠搜氏來賓

十九年命共工治河

二十九年春無佻氏來朝貢沒羽

四十二年景日三見於翼

五十年帝遊以首山乘素車玄駒

五十三年帝祭於洛

五十八年帝使后稷放帝子朱於丹水

六十一年命崇伯鯀治河

六十九年黜崇伯鯀

七十年春正月帝使四岳錫虞舜命

帝在位七十年景星出翼鳳凰在庭朱草生
嘉禾秀甘露潤醴泉出日月如合璧五星如
連珠厨中自生肉其薄如筴搖動則風生食

物寒而不臭名曰萑脯又有草莢階而生月朔始生一莢月半而生十五莢十六日以後日落一莢及晦而盡月小則一莢焦而不落名曰萑莢一曰曆莢洪水既平歸功於舜將以天下禪之乃潔齊修壇場於河洛擇良日率舜等升首山遵河渚有五老游焉蓋五星之精也相謂曰河圖將來告帝以期知我者重瞳黃姚五老因飛為流星上入昴二月辛

丑昧明禮備至於日昃榮光出河休氣四塞白雲起回風搖乃有龍馬銜甲赤文綠色緣壇而上吐甲圖而去甲似龜背廣九尺其圖以白玉為檢赤土為○泥似黃金約以青繩檢文曰闔色授帝舜言虞夏當授天命帝乃寫其言藏於東序後二年二月仲辛率羣臣沈璧於洛禮畢退俟至於下昃赤光起玄龜負書而出背甲赤文成字止壇其書言當禪

舜遂讓舜

七十一年帝命二女嬪於舜

七十三年春正月舜受終於文祖

七十四年虞舜初巡狩四岳

七十五年司空禹治河

七十六年司空伐曹魏之戎克之

八十六年司空入觀贊用玄圭

八十七年初建十有二州

八十九年作游宮於陶

九十年帝游居於陶

九十七年司空巡十有二州

一百年帝陟於陶

帝子丹朱避舜於房陵舜讓不克朱遂封於

房為虞賓三年舜即天子之位

帝舜有虞氏

母曰握登見大虹意感而生舜於姚墟目重

瞳子故名重華龍顏大口黑色身長六尺一
寸舜父母憎舜使其塗廩自下蒸之舜服鳥
工衣服飛去又使浚井自上填之以石舜服
龍工衣自傍而出耕於歷夢眉長與髮等遂
登庸

元年己未帝即位居冀一作大韶之樂

即帝位萸莢生於階鳳凰巢於庭擊石拊石
以歌九韶百獸率舞景星出於房地出乘黃

之馬

三年命咎陶作刑

九年西王母來朝

西王母之來朝獻白環玉玦

十四年卿雲見命禹代虞事

在位十有四年奏鐘石笙管未罷而天大雷
雨疾風登屋拔木桴鼓播地鐘○亂行舞人
頓伏樂正狂走舜乃磬堵持衡而笑曰明哉

天下非一人之天下也亦乃見於鐘石笙篳
乎乃薦禹於天使行天子事也於時和氣普
應慶雲興焉若烟非烟若雲非雲郁郁紛紛
蕭索輪囷百工相和而歌卿雲帝乃倡之曰
慶雲爛兮禮縵縵兮日月光華旦復旦兮羣
臣咸進頓首曰明明上天爛然星陳日月光
華弘於一人帝乃再歌曰日月有常星辰有
行四時從經萬姓允誠於予論樂配天之靈

遷於聖賢莫不咸聽饗乎鼓之軒乎舞之精
華以竭褻裳去之於是八風循通慶雲叢聚
蟠龍奮迅於其藏蛟魚踊躍於其淵龜鱉咸
出其穴遷虞而事夏舜乃設壇於河依堯故
事至於下昃榮光休至黃龍負圖長三十二
尺廣九尺出於壇畔赤文綠錯其文言當禪

禹

十五年帝命夏后有事於太室

十七年春二月入學初用萬

二十五年息慎氏來朝貢弓矢

二十九年帝命子義鈞封於商

三十年葬后育於渭

三十二年帝命夏后總師遂陟方岳

三十三年春正月夏后受命於神宗遂復九州

三十五年帝命夏后征有苗有苗氏來朝

四十二年亥都氏來朝貢寶玉

四十七年冬隕霜不殺草木

四十九年帝居於鳴條

五十年帝陟

義鈞封於商是謂商均后育娥皇也鳴條有
蒼梧之山帝崩遂葬焉今海州

帝禹夏后氏

母曰脩己出行見流星貫昴夢接意感既而吞
神珠脩己背剖而生禹於石紐虎鼻吞兩耳

參鑿首戴鉤鈴胷有玉斗足文履已故名文
命長有聖德長九尺九寸夢自洗於河取水
飲之又有白狐九尾之瑞當堯之世舜舉之
禹觀於河有長人白面魚身出曰吾河精也
呼禹曰文命治水言訖授禹河圖言治水之
事乃退入於淵禹治水既畢天錫玄珪以告
成功夏道將興草木暢茂青龍止於郊祝融
之神降於崇山乃受舜禪即天子之位洛出

龜書是為洪範三年喪畢都於陽城

元年壬子帝即位居冀○頒夏時於邦國

二年咎陶薨

五年巡狩會諸侯於塗山

南巡狩濟江中流有二黃龍負舟舟人皆懼
禹笑曰吾受命於天屈力以養人生性也死
命也奚憂龍哉龍於是曳尾而逝

八年春會諸侯於會稽殺防風氏○夏六月雨

金於夏邑○秋八月帝陟於會稽禹立四十五年

禹薦益於天七年禹崩三年喪畢天下歸啓

帝啓

元年癸亥帝即位於夏邑大饗諸侯於鈞臺諸侯從

帝歸於冀都大饗諸侯於璿臺

二年費侯伯益出就國○王帥師伐有扈大戰

於甘

有扈在始平鄠縣

六年伯益薨祠之

八年帝使孟涂如巴涖訟

十年帝巡狩舞九韶於大穆之野

十一年放王季子武觀於西河

武觀即五觀也觀國今之頓丘

衛縣

十五年武觀以西河叛彭伯壽帥師征西河武觀來歸

十六年陟

帝太康

元年癸未帝即位居斟鄩鄩敗於洛表羿入居斟

鄩

四年陟

帝仲康

元年己丑帝即位居斟鄩

五年秋九月庚戌朔日有食之命胤侯帥師征

義和

六年錫昆吾命作伯

七年陟○世子相出居商丘依邠侯
一作依同姓諸侯斟

帝相

元年戊戌帝即位居商○征淮夷

二年征風及黃夷

七年于夷來賓

八年寒浞殺羿使其子澆居過
九年相居於斟灌

十五年商侯相土作乘馬遂遷於商丘

二十年寒浞滅戈

二十六年寒浞使其子澆帥師滅斟灌

二十七年澆伐斟鄩大戰於濰覆其舟滅之

二十八年寒浞使其子澆弑帝后緡歸於有仍

伯靡出奔鬲

斟灌之墟是為帝丘后緡方娠逃出自竇歸

於有仍伯靡奔有鬲氏

夏世子少康生丙寅年

少康自有仍奔虞乙酉年

伯靡自鬲帥斟鄩斟灌之師以伐浞世子少康

使汝艾伐過殺澆甲辰年 ○伯子杼帥師滅戈

伯靡殺寒浞少康自綸歸於夏邑丁巳年

明年后緡生少康既長為仍牧正基澆能戒

之澆使樹求之將至仍少康逃奔有虞為之
庖正以除其害虞思於是妻之以二姚而邑
諸綸有田一成有衆一旅能布其德而兆其
謀以收夏衆撫其官職夏之遺臣伯靡自有
禹氏收二斟之燼以伐浞浞恃澆皆康娛日
忘其惡而不為備少康使汝艾謀澆初浞娶
純狐氏有子早死其婦曰女岐寡居澆強圉
往至其戶陽有所求女岐為之縫裳共舍而

宿汝艾夜使人舉斷其首乃女岐也澆既多
力又善害艾乃敗獵放犬逐獸因嗾澆顛隕
乃斬澆以歸於少康於是夏衆滅浞奉少康
歸於夏邑諸侯始聞之立為天子祀夏配天
不失舊物

帝少康

元年丙午帝即位諸侯來朝賓虞公
二年方夷來賓

三年復田稷

后稷之後不窟失官至是而復

十一年使商侯冥治河

十八年遷於原

二十一年陟

帝杼

元年己巳帝即位居原

五年自原遷於老丘

八年征於東海及三壽得一狐九尾

十三年商侯冥死於河

十七年陟

杼或作帝宁一曰伯杼杼能帥禹者也故夏

后氏報焉

帝芬

元年戊子帝即位

三年九夷來御

十六年洛伯用與河伯憑夷鬪

三十三年封昆吾氏子於有蘇

三十六年作圜土

四十四年陟

芬或曰芬發

帝芒

元年壬申帝即位以玄珪賓於河

十三年東狩於海獲大魚

三十三年商侯遷於殷

五十八年陟

芒或曰帝荒

帝泄

帝元年辛未帝即位

十二年殷侯子亥賓於有易有易殺而放之

十六年殷侯微以河伯之師伐有易殺其君綿

臣

殷侯子亥賓於有易而淫焉有易之君綿臣
殺而放之故殷上甲微假師於河伯以伐有
易滅之遂殺其君綿臣中葉衰而上甲微復
興故殷人報焉

二十一年命畎夷白夷玄夷風夷

黃夷

二十五年陟

帝不降

元年己亥帝即位

六年伐九菝

三十五年殷滅皮氏

五十九年遜位於弟高

帝高

元年戊戌帝即位

十年帝不降陟

三代之世內禪惟不降實有聖德

十八年陟

帝履

一名胤甲

元年己未帝即位居西河

四年作西音○昆吾氏遷於許已姓名樊封于衛夏衰為伯遷

於舊許

八年天有祲孽十日並出其年陟

帝孔甲

元年乙巳帝即位居西河○廢豕韋氏使劉累

豢龍

三年王畋於萑山

五年作東音

七年劉累遷於魯陽

王好事鬼神肆行淫亂諸侯化之夏政始衰
田於東陽萑山天大風晦育孔甲迷惑入於
民室主人方乳或曰后來見良日也之子必
大吉或又曰不勝也之子必有殃孔甲聞之

曰以為余一人子夫誰殃之乃取其子以歸
既長為斧所戕乃作破斧之歌是為東音劉
累所畜龍一雌死潛醢以食夏后夏后饗之
既而使求之懼而遷於魯陽其後為范氏
九年陟○殷侯復歸於商丘

帝昊

昊一作臯

元年庚辰帝即位○使豕韋氏復國

夏衰昆吾豕韋相繼

為伯

三年陟

帝發

一名后敬或曰發惠

元年乙酉帝即位○諸侯賓於王門冉保墉會
於上池○諸夷入舞

七年陟○泰山震

帝癸

竹書紀年

卷上

上

序

一名桀

元年壬辰帝即位居斟鄩

三年築傾宮○毀容臺○畎夷入於岐以叛

六年岐踵戎來賓

十年五星錯行夜中星隕如雨○地震○伊洛

竭

十一年會諸侯於仍有緡氏逃歸遂滅有緡

十二年遷於河南○初作輦

十四年扁師代崑山一作山民

癸命扁伐山民一作山民民女於桀二人曰琬

后愛二人女無子焉斷其方名於茗華之玉茗

是琬華是琰而棄其元妃於洛曰妹喜於傾

宮飾瑤臺居之

十五年商侯履遷於亳成湯元年

十七年商使伊尹來朝

二十年伊尹歸於商及汝鳩汝方會於北門

二十一年商師征有洛克之遂征荆降

二十二年商侯履來朝命囚履於夏臺

二十三年釋夏侯履○諸侯遂賓於閭

二十六年商滅溫

二十八年昆吾氏伐商商會諸侯於景亳遂征

韋商師取韋遂征顧○太史令終古出奔商

二十九年商師取顧○三日並出○費公昌出

奔商○冬十月鑿山穿陵以通於河

三十年瞿山崩○殺其大夫關龍逢○商師征

昆吾○冬聆隧災

三十一年商自隔征夏邑克昆吾大雷雨戰於

鳴條夏師敗績桀出奔三朥商師征三朥戰於

剌獲桀於焦門放之於南巢

自禹至桀十七世有王與無王用歲四百七

十一年

起壬子
終壬戌

殷商成湯

名履

湯有七名而九征放桀於南巢而還諸侯八
譯而來者千八百國竒肱氏以車至乃同尊
天乙履為天子三讓遂即天子之位初高辛
氏之世妃曰簡狄以春分玄鳥至之日從帝
祀郊禘與其妹浴於玄丘之水有玄鳥銜卵
而墜之五色甚好二人競取覆以二筐簡狄
先得而吞之遂孕胷剖而生契長為堯司徒

成功於民受封於商後十三世生主癸主癸
之妃曰扶都見白氣貫月意感以乙日生湯
號天乙豐下銳上哲而有顛句身而揚聲長
九尺臂有四肘是為成湯湯在亳能脩其德
伊摯將應湯命夢乘船過日月之傍湯乃東
至於洛觀帝堯之壇沈璧退立黃魚雙踴黑
鳥隨之止於壇化為黑玉又有黑龜竝赤文
成字言夏桀無道湯當代之禱杙之神見於

邳山有神牽白狼銜鉤而入商朝金德將盛
銀自山溢湯將奉天命放桀夢及天而舐之
遂有天下商人後改天下之號曰殷

十八年癸亥王即位居亳○始屋夏社

十九年大旱○氐羗來賓

二十年大旱○夏桀卒於亭山禁弦歌舞

二十一年大旱○鑄金幣

二十二年大旱

二十三年大旱

二十四年大旱王禱於桑林雨

二十五年作大濩樂○初巡狩定獻令

二十七年遷九鼎於商邑

二十九年陟

外丙

名勝

元年乙亥即位居亳命卿士伊尹

二年陟

仲壬

名庸

元年丁丑王即位居亳命卿士伊尹

四年陟

太甲

名至

元年辛巳王即位居亳命卿士伊尹伊尹放太

甲於桐乃自立

約按伊尹自立蓋誤以攝政為真爾

七年王潛出自桐殺伊尹天大霧三日乃立其子伊陟伊奮命復其父之田宅而中分之

約按此文與前後不類蓋後世所益

十年大饗於太廟○初祀方明

十二年陟

沃丁

名絢

元年癸巳王即位居亳命鄉士咎單

八年祠保衡

十九年陟

小庚約按史記作太庚

名辨

元年壬子王即位居亳

五年陟

小甲

名高

元年丁巳王即位居亳

十七年陟

雍巳

名侻

元年甲戌王即位居亳

十二年陟

圖書館, NATIONAL CENTRAL LIBRARY, TAIWAN, R.O.C.

太戊

名密

元年丙戌王即位居亳命卿士伊陟臣扈

七年有桑穀生於朝

十一年命巫咸禱於山川

二十六年西戎來賓王使王孟聘西戎

三十一年命費侯中衍為車正

三十五年作寅車

四十六年大有年

五十八年城蒲姑

六十一年東九夷來賓

七十五年陟

大戊遇祥桑側身脩行三年之後遠方慕明德重譯而至者七十六國商道復興廟為中

宗

竹書作
太宗

仲丁

名蒞

元年辛丑王即位自亳遷於囂於河上

六年征藍夷

九年陟

外壬

名發

元年庚戌王即位居囂○邳人姚人叛

十年陟

河亶甲

名整

元年庚申王即位自囂遷於相

三年彭伯克邳

四年征藍夷

五年佻人入於班方彭伯韋伯伐班方佻人來

賓

九年陟

祖乙

名滕

元年己巳王即位自相遷於耿命彭伯韋伯
二年圮於耿自耿遷於庇

三年命卿士巫賢

八年城庇

十五年命邠侯高圉

十九年陟

祖乙之世高圉道復興廟為中宗

史記與無逸皆無之

祖辛

名且

元年戊子王即位居庇

十四年陟

開甲史記作沃甲

名踰

元年壬寅王即位居庇

五年陟

祖丁

名新

元年丁未王即位居庇

九年陟

南庚

名更

元年丙辰王即位居庇

三年遷於奄

六年陟

陽甲

一名和甲

名和

元年壬戌王即位居奄

三年西征丹山戎

四年陟

盤庚

元年

卷上

三

名旬

元年丙寅王即位居奄

七年應侯來朝

十四年自奄遷於北蒙曰殷

十五年營殷邑

十九年命邠侯亞圉

二十八年陟

小辛

名頌

元年甲午王即位居殷

三年陟

小乙

名斂

元年丁酉王即位居殷

六年命世子武丁居於河學於甘盤

十年陟

武丁

名昭

元年丁未王即位居殷命卿士甘盤

三年夢求傳說得之

六年命卿士傳說視學養老

十二年報祀上甲微

二十五年王子孝已卒於野

二十九年彤祭太廟有雉來

三十二年伐鬼方次於荆

三十四年王師克鬼方氏羗來賁

四十三年王師滅大彭

五十年征豕韋克之

五十九年陟

王殷之大仁也力行王道不敢荒寧嘉靖殷
邦至於大小無時或怨是時輿地東不過江
黃西不過氐羗南不過荆蠻北不過朔方而

頌聲作禮廢而復起廟號高宗

祖庚

名曜

元年丙午即位居殷作高宗之訓

十一年陟

祖甲

國語作帝甲

名載

元年丁巳王即位居殷

十二年征西戎○冬王返自西戎

祖甲西征得一丹山

十三年西戎來賓命邠侯組紕

二十四年重作湯刑

二十七年命王子囂王子良

三十三年陟

王鷲在野及即位知小人之依能保惠庶民不侮鰥寡迨其末也繁刑以攜遠殷道復衰

國語曰玄王勤商十有四世帝甲亂之七世而顛

十
馮辛

史記作
廩辛

名先

元年庚寅王即位居殷

四年陟

庚丁

名囂

元年甲午王即位居殷

八年陟

武乙

名瞿

元年壬寅王即位居殷邠遷於岐周

三年自殷遷於河北○命周公亶父賜以岐邑

十五年自河北遷於沫

二十一年周公亶父薨

二十四年周師伐程戰於畢克之

三十年周師伐義渠乃獲其君以歸

三十四年周公季歷來朝王賜地三十里五十
穀馬十匹

三十五年周公季歷伐西落鬼戎○王畋於河
渭大雷震死

文丁

史記作
太丁非

名托

元年丁丑王即位居殷

自沫歸
殷邑

二年周公季歷伐燕京之戎敗績

三年洹水一日三絕

四年周公季歷伐余無之戎克之命為牧師

五年周作程邑

七年周公季歷伐始呼之戎克之

十一年周公季歷伐翳徒之戎獲其三大夫來

獻捷王殺季歷

王嘉季歷之功錫之圭瓚秬鬯九命為伯既
而執諸塞庫季歷困而死因謂文丁殺季歷

執王季於塞庫羈文王於玉門
鬱尼之情辭以作歌其傳久矣

十二年

周文公元年

有鳳集於岐山

十三年

帝乙

名羨

元年庚寅王即位居殷

三年王命南仲西拒昆夷城朔方○夏六月周

地震

九年

帝辛

名受

即紂也一曰受辛

元年己亥王即位居殷命九侯周侯邗侯

周侯為西

伯

三年有雀生鷁

四年大蒐于黎○作炮烙之刑

五年夏築南單之臺○雨土於臺

六年西伯初禴於畢

九年王師伐有蘇獲妣己以歸○作瓊室立玉門

十年夏六月王畋於西郊

十七年西伯伐翟○冬王遊於淇

二十一年春正月諸侯朝周○伯夷叔齊自孤竹歸於周

二十二年冬大蒐於涇

二十三年囚西伯於羑里

二十九年釋西伯諸侯逆西伯歸於程

三十年春三月西伯率諸侯入貢

三十一年西伯治兵於畢得呂尚以為師

三十二年五星聚於房○有赤鳥集於周社○密人侵阮西伯帥師伐密

三十三年密人降於周師遂遷於程○王錫命西伯得專征伐

約按文王受命九年大統未集蓋得專征伐
受命自此年始

三十四年周師取耆及邠遂伐崇崇人降○冬
十二月昆夷侵周

三十五年周大饑西伯自程遷於豐

三十六年春正月諸侯朝於周遂伐昆夷○西
伯使世子發營鎬

三十七年周作辟雍

三十九年大夫辛甲出奔周

四十年周作靈臺○王使膠鬲求玉於周

四十一年春三月西伯昌薨周文王葬畢畢
西於豐三十里

四十二年周武王
元年西伯發受丹書於呂尚○有
女子化為丈夫

四十三年春大閔○嶢山崩

四十四年西伯發伐黎

四十七年内史向摯出奔周

四十八年夷羊見○二日竝出

五十一年冬十一月戊子周師渡盟津而還○
王囚箕子殺王子北干微子出奔

五十二年庚寅周始伐殷○秋周師次於鮮原
冬十有二月周師有事於上帝庸蜀羗髳微盧

彭濮從周師伐殷

伐殷至邠丘更
名邠丘曰懷

湯滅夏以至於受二十九王用歲四百九十

六年

起癸亥
終戊寅

竹書紀年卷上終



國家圖書館, NATIONAL CENTRAL LIBRARY, TAIWAN, R.O.C.



竹書紀年卷下

周武王

名發初高辛氏之世妃曰姜嫄助祭郊禘見大人迹履之當時歆如有人道感已遂有身而生男以為不祥棄之阨巷羊牛避而不踐又送之山林之中會伐林者又取而置寒冰上大鳥以一翼籍覆之姜嫄以為異乃收養焉名之曰棄枝願有異相長為堯稷官有功



於民后稷之孫曰公劉有德諸侯皆以天子之禮待之初黃帝之世讖言曰西北為王期在甲子昌制命發行誅旦行道及公劉之後十三世而生季歷季歷之十年飛龍盈於殷之牧野此蓋聖人在下位將起之符也季歷之妃曰大任夢長人感已浚於豕牢而生昌是為周文王龍顏虎肩身長十尺臂有四乳大王曰吾世當有興者其在昌乎季歷之兄

曰太伯知天命在昌適越終身不反弟仲雍從之故季歷為嗣以及昌昌為西伯作邑於豐文王之妃曰太姒夢商庭生棘太子發植梓樹於闕間化為松柏棫柞以告文王文王幣率羣臣與發竝拜告夢季秋之甲子赤爵銜書及豐置於昌戶昌拜稽首受其文要曰姬昌蒼帝子亡殷者紂王將畋史編卜之曰將太獲非熊非羆天遣大師以佐昌臣太祖

史疇為禹卜畋得臯陶其兆類此至於磻溪
之水呂尚釣於涯王下趨拜曰望公七年乃
今見光景於斯尚立變名荅曰望釣得玉璜
其文要曰姬受命昌來提撰爾洛鈴報在齊
尚出游見赤人自洛出授尚書命曰召佐昌
者子文王夢日月著其身又鸞鷲鳴於岐山
孟春六旬五緯聚房後有鳳凰銜書游文王
之都書又曰殷帝無道虐亂天下星命已移

不待後久靈祇遠離百神吹去五星聚房昭
理四海文王既沒太子發代立是為武王武
王駢齒望羊將伐紂至於孟津八百諸侯不
期而會咸曰紂可伐矣武王不從及紂殺比
干囚箕子微子去之乃伐紂度孟津中流白
魚躍入王舟王俯取魚長三尺目下有赤文
成字言紂可伐王寫以世字魚文消燔魚以
告天有火自天止於王屋流為赤鳥烏銜穀



馬穀者紀后稷之德火者燔魚以告天天火
流下應以告也遂東伐紂勝於牧野兵不血
刃而天下歸之乃封呂尚於齊周德既隆草
木茂盛蒿堪為宮室因名蒿室既有天下遂
都於鎬

十二年辛卯王率西夷諸侯伐殷敗之於珣野
王親禽受於南單之臺遂分天之明立受子祿
父是為武庚○夏四月王歸於豐饗於太廟命

監殷遂狩於管○作大武樂

十三年巢伯來賓○薦殷於太廟遂大封諸侯
○秋大有年

十四年王有疾周文公禱於壇墀作金縢

十五年肅慎氏來賓○初狩方岳誥於涿邑○
冬遷九鼎於洛

十六年箕子來朝○秋王師滅蒲姑

十七年命王世子誦於東宮○冬十有二月王

陟年五十四

成王

名誦

元年丁酉春正月王即位命冢宰周文公總百官○庚午周公誥諸侯於皇門○夏六月葬武王於畢○秋王加元服○武庚以殷叛○周文公出居於東

二年奄人徐人及淮夷入于邳以叛○秋大雷

電以風王逆周文公于郊遂伐殷

三年王師滅殷殺武庚祿父遷殷民于衛遂伐

奄滅蒲姑

姑與四國作亂故周文公伐之

四年春正月初朝于廟○夏四月初嘗麥○王

師伐淮夷遂入奄

五年春正月王在奄遷其君于蒲姑○夏五月

王至自奄○遷殷民于洛邑遂營成周

六年大蒐于岐陽

七年周公復政于王○春二月王如豐○三月
召康公如洛度邑○甲子周文公誥多士于成
周遂城東都○王如東都諸侯來朝○冬王歸
自東都○立高圜廟

八年春正月王初蒞柞親政○命魯侯禽父齊
侯伋遷庶殷于魯○作象舞○冬十月王師滅
唐遷其民于杜

九年春正月有事于太廟初用勺○肅慎氏來

朝王使榮伯錫肅慎氏命

十年王命唐叔虞為侯○越裳氏來朝○周文
公出居于豐

十一年春正月王如豐○唐叔獻嘉禾王命唐
叔歸禾于周文公○王命周平公治東都

約按周平公即君陳周公之子伯禽之弟

十二年王帥燕師城韓王錫韓侯命

十三年王師會齊侯魯侯伐戎○夏六月魯大

禘于周公廟

十四年秦師圍曲城克之○冬洛邑告成

十八年春正月王如洛邑定鼎○鳳凰見遂有事于河

武王沒成王少周公旦攝政七年制禮作樂神鳥鳳凰見冀莢生乃與成王觀于河洛沈璧禮畢王退俟至于日昃榮光竝出幕河青雲浮至青雘臨壇銜玄甲之圖坐之而去禮

于洛亦如之玄龜青龍蒼光止于壇背甲刻書赤文成字周公援筆以世文寫之書成文消龜隨甲而去其言自周公訖于秦漢盛衰之符麒麟遊苑鳳凰翔庭成王援琴而歌曰鳳凰翔兮於紫庭余何德兮以感靈賴先王兮恩澤臻于胥樂兮民以寧

十九年王巡狩侯甸方岳召康公從歸于宗周遂正百官黜豐侯

二十一年除治象○周文公薨于豐

二十二年葬周文公于畢

二十四年於越來賓

二十五年王大會諸侯于東都四夷來賓○冬

十月歸自東都有事于太廟

三十年離戎來賓

約按離戎驪山之戎也為林氏所伐告于成

王

三十三年王遊于卷阿召康公從歸于宗周

命王世子釗如房逆女房伯祈歸于宗周

三十四年雨金于咸陽

約按咸陽天雨金三年國有大喪

三十七年夏四月乙丑王陟

康王

名釗

元年甲戌春正月王即位命冢宰召康公總百

官諸侯朝于豐宮

三年定樂歌吉禘于先王申戒農官告于廟
六年齊太公薨

九年唐遷于晉作宮而美王使人讓之

十二年夏六月壬申王如豐錫畢侯命○秋毛
懿公薨

十六年錫齊侯伋命○王南巡狩至九江廬山
十九年魯侯禽父薨

二十一年魯築茅闕門

二十四年召康公薨

二十六年秋九月己未王陟

昭王

名瑕

元年庚子春正月王即位復設象魏

六年王錫郇伯命○冬十二月桃李華

十四年夏四月恒星不見○秋七月魯人弑其

君寧

十六年伐楚涉漢遇大兇

十九年春有景孛于紫微○祭公辛伯從王伐
楚天大曠雉兔皆震喪六師于漢○王陟

穆王

名滿

元年己未春正月王即位作昭宮命辛伯餘

○冬十月築祗宮于南鄭

自武王至穆王享國百年穆王以下都于西

鄭

六年春徐子誕來朝錫命為伯

八年春北唐來賓獻一驪馬是生騶耳

九年築春宮

王所居有
鄭宮春宮

十一年王命卿士祭公謀父

十二年毛公班共公利逢公固帥師從王伐犬
戎○冬十月王北巡狩遂征犬戎

十三年春祭公帥師從王西征次于阻紆○秋七月西戎來賓○徐戎侵洛○冬十月造父御王入于宗周

十四年王帥楚子伐徐戎克之○夏四月王畋于軍丘○五月作范宮○秋九月翟人侵畢冬蒐于萍澤○作虎牢

十五年春正月留昆氏來賓○作重璧臺○冬王觀於鹽澤一作王幸安邑觀鹽池非是

十六年霍侯舊薨○王命造父封于趙

十七年王西征昆侖丘見西王母其年西王母來朝賓于昭宮○秋八月遷戎于太原

王北征行流沙千里積羽千里征犬戎取其

五王以東西征于青鳥所解三危山西征還履

天下億有九萬里

十八年春正月王居祗宮諸侯來朝

二十一年祭文公薨

二十四年王命左史戎夫作記

三十五年荆人入徐毛伯遷帥師敗荆人于泲
三十七年大起九師東至于九江架鼃鼃以為
梁遂伐越至于紆○荆人來貢

三十九年王會諸侯于塗山

四十五年魯侯潰薨

五十一年作呂刑命甫侯于豐

五十五年王陟于祗宮

六王

名繫

元年甲寅春正月王即位

四年王師滅密

九年春正月丁亥王使內史良錫毛伯遷命

十二年王陟

懿王

名堅

元年丙寅春正月王即位天再旦于鄭

七年西戎侵鎬

十三年翟人侵岐

十五年王自宗周遷于槐里

十七年魯厲公擢薨

二十一年虢公帥師北伐犬戎敗逋

二十五年王陟

懿王之世興居無節號令不時挈壺氏不能

共其職諸侯于是攜德

孝王

名辟方

元年辛卯春正月王即位命申侯伐西戎

五年西戎來獻馬

七年冬大雨電江漢水牛馬死是年厲王生

八年初牧于沂渭

九年王陟

夷王

名燮

元年庚子春正月王即位

二年蜀人呂氏來獻瓊玉賓于河用介珪

三年王致諸侯烹齊哀公于鼎

六年王獵于社林獲犀牛一以歸

七年虢公帥師伐太原之戎至于俞泉獲馬千

匹○冬雨雪大如礪○楚子熊渠代庸至于郢

八年王有疾諸侯禘于山川○王陟

厲王

名胡居彘有汾水焉故又曰汾王

元年戊申春正月王即位作夷宮命卿士榮夷

公落○楚人來獻龜貝

三年淮夷侵洛王命虢公長父伐之不克○齊

獻公山薨

六年楚子延卒

八年初監謗蒯伯良夫戒百官于朝

十一年西戎入于犬丘

十二年王亡奔彘國人圍王宮執召穆公之子

殺之

十三年王在彘共伯和攝行天子事

號曰共和

十四年玁狁侵宗周西鄙○召穆公帥師追荆

蠻至于洛

十六年蔡武侯薨○楚子勇卒

十九年曹夷伯薨

二十二年大旱○陳幽公薨

二十三年大旱○宋僖公薨

二十四年大旱○杞武公薨

二十五年大旱○楚子巖卒

二十六年大旱王陟于彘周定公召穆公立太

子靖為王共伯和歸其國遂大雨

大旱既久廬舍俱焚會汾王崩卜于太陽兆

曰厲王為崇周公召公乃立太子靖共和遂
歸國和有至德尊之不喜廢之不怒道遠得
志于共山之首

宣王

名靖

元年甲戌春正月王即位周定公召穆公輔政
○復田賦○作戎車○燕惠侯薨

二年錫大師皇父司馬休父命○魯慎公薨○

曹公子蘇弒其君幽伯彊

三年王命大夫仲伐西戎○齊武公壽薨

四年王命蹇父如韓韓侯來朝

五年夏六月尹吉甫帥師伐玁狁至于太原○
秋八月方叔帥師伐荆蠻

六年召穆公帥師伐淮夷○王帥師伐徐戎皇
父休父從王伐徐戎次于淮○王歸自伐徐錫
召穆公命○西戎殺秦仲○楚子霜卒

七年王錫申伯命○王命樊侯仲山甫城齊
八年初考室○魯武公來朝錫魯世子戲命
九年王會諸侯于東都遂守于甫

十二年魯武公薨○齊人弑其君厲公無忌立
公子赤

十五年衛釐侯薨○王錫虢文公命

十六年晉遷于絳

十八年蔡夷侯薨

二十一年魯公之伯御殺其君懿公戲

二十二年王錫王子多父命居洛

二十四年齊文公赤薨

二十五年大旱王禱于郊廟遂雨

二十七年宋惠公觀薨

二十八年楚子徇卒

二十九年初不藉千畝

三十年有兔舞于鎬京

三十二年王師伐魯殺伯御命孝公稱于夷宮
○陳僖公孝薨○有馬化為人

三十三年齊成公薨○王師伐太原之戎不克
三十七年有馬化為狐○燕僖侯卒○楚子鄂
卒

三十八年王師及晉穆侯伐條戎奔戎王師敗
逋

三十九年王師伐姜戎戰于千畝王師敗逋

四十年料民于太原○戎人滅姜邑○晉人敗
北戎于汾隰

四十一年王師敗于申

四十三年王殺大夫杜伯其子隰叔出奔晉○
晉穆侯費生薨弟殤叔自立世子仇出奔

四十四年

晉殤叔元年
丁巳

四十六年王陟

幽王

名涅

元年庚申春正月王即位○晉世子仇歸于晉
殺殤叔晉人立仇是為文侯○王錫太師尹氏
皇父命

二年

辛酉晉文侯元年

涇渭洛竭○岐山崩○初增賦

○晉文侯同王子多父伐鄆克之乃居鄭父之
丘是為鄭桓公

三年王嬖褒姒○冬大震電

四年秦人伐西戎○夏六月隕霜○陳夷公薨
五年王世子宜臼出奔申○皇父作都于向
六年王命伯士帥師伐六濟之戎王師敗逋○
西戎滅蓋○冬十月辛卯朔日有食之
七年虢人滅焦

八年王錫司徒鄭伯多父命○王立褒姒之子
曰伯服為太子

九年申侯聘西戎及鄆

十年春王及諸侯盟于太室○秋九月桃李實
○王師伐申

十一年春正月日暈○申人鄩人及犬戎入宗
周弑王及鄭桓公犬戎殺王子伯服執褒姒以
歸申侯魯侯許男鄭子立宜臼于申虢公翰立
王子余臣于攜是為攜王
二王並立

武王滅殷歲在庚寅二十四年歲在甲寅定
鼎洛邑至幽王二百五十七年共二百八十

一年自武王元年己卯至幽王庚午二百九
十二年

平王

名宜
曰

自東遷以後始紀晉事王即位皆不書

元年辛未王東徙洛邑錫文侯命晉侯會衛侯
鄭伯秦伯以師從王入于成周

二年秦作西時○魯孝公薨○賜秦晉以邠岐
之田

三年齊人滅祝○王錫司徒鄭伯命

四年燕傾侯卒○鄭人滅虢

五年秦襄公帥師伐戎卒于師○宋戴公薨

六年燕哀侯卒○鄭遷于濬洧

七年楚子儀卒

八年鄭殺其大夫關其思

十年秦還于汧渭

十三年魏武公薨

十四年晉人滅韓

十八年秦文公大敗戎師于岐來歸岐東之田

二十一年晉文侯殺王子余臣于攜

二十三年宋武公卒

二十四年秦作陳寶祠

二十五年晉文侯薨○秦初用旂刑

二十六年丙申晉昭侯元年晉封其弟成師于曲沃

三十二年晉潘父弑其君昭侯納成師不克立

昭侯之子孝侯晉人殺潘父

三十三年癸卯晉孝侯元年楚人侵申

三十六年衛莊公卒○王人戍申

四十年齊莊公卒○晉曲沃桓叔成師卒子鱗

立是為莊伯自是晉侯在翼稱翼侯

四十一年辛亥莊伯元年春大雨雪

四十二年狄人伐翼至於晉郊○宋襄公薨○

魯惠公使宰讓請郊廟之禮王使史角如魯諭

止之

四十七年晉曲沃莊伯入翼弑孝侯晉人逐之

立孝侯子卻是為鄂侯

四十八年戊午晉鄂侯卻元年無雲而雷○魯惠公卒

四十九年己未魯隱公元年春秋始此魯隱公及邾莊公盟

于姑蔑

五十一年春二月乙巳日有食之○三月庚戌

王陟

桓王 名林

元年壬戌十月莊伯以曲沃叛伐翼公子萬救翼荀叔軫追之至于家谷翼侯焚曲沃之禾而還翼侯伐曲沃大捷武公請成于翼至相而還

相一作桐

二年王使虢公伐晉之曲沃晉鄂侯卒曲沃莊伯復攻晉立鄂侯子光是為哀侯公子萬救翼荀叔軫追之至于家谷

三年甲子

晉哀侯光元年

四年曲沃莊伯卒子稱立是為武公尚一軍

五年

曲沃武公元年

荀人乘京○荀人董伯皆叛曲沃

十一年

晉小子侯元年

曲沃獲晉哀侯晉人立哀侯子

為小子侯荀伯萬出奔魏

萬之母逐焉

十二年王師秦師圍魏取荀伯萬而東之

十三年冬曲沃伯誘晉小子侯殺之晉曲沃滅

荀以其地賜大夫原氏黯是為荀叔戎人逆荀

伯萬于郊

十四年王命虢仲伐曲沃立晉哀侯弟緡于翼為晉侯

十五年

晉侯緡元年

十六年春滅翼

十九年鄭莊公卒

二十三年三月乙未王陟

莊王

名佗

元年乙酉曲沃尚一軍異于晉

六年五月葬桓王

十五年王陟

釐王

名胡齊

元年庚子春齊桓公會諸侯于北杏以平宋亂
三年曲沃武公滅晉侯緡以寶獻王王命武公以一軍為晉侯

四年

晉武公二十八年

晉猶不與齊桓公之盟

左傳註晉侯緡是年滅

五年晉武公卒子詭諸立為獻公王陟

惠王 名闞

元年 乙巳晉獻公元年 晉獻公朝○王如成周周陽白

克舞于市

二年王子頽亂王居于鄭鄭人入王府多取玉

玉化為緘射人

九年晉城絳

十六年晉獻公作二軍滅耿以賜大夫趙夙滅

魏以賜大夫畢萬

晉滅於大夫趙韓魏萌於此

十七年衛懿公及赤狄戰于洞澤

洞當作洞

十九年晉獻公會虞師伐虢滅下陽虢公醜奔

衛公命瑕父呂甥邑于國都

二十五年春正月狄人伐晉○王陟

襄王

元年庚午晉獻公卒立奚齊里克殺之及卓子

立夷吾

二年

辛未晉惠公元年

晉殺里克

三年雨金子晉

七年秦伯涉河伐晉

十五年晉惠公卒子懷公圍立秦穆公帥師送公子重耳圍令狐桑泉臼衰皆降為秦師狐毛與先軫禦秦至于廬柳乃謂秦穆公使公子繫來與師言次子郇盟于軍公子重耳涉自河曲

十六年

乙酉晉文公元年

晉殺子圉

十七年晉城荀

二十年周襄王會諸侯于河陽

二十二年齊師逐鄭太子齒奔城張南鄭

二十四年晉文公卒

二十五年

甲午晉襄公元年

三十年洛緄于洵

三十一年晉襄公卒

三十二年

辛丑晉靈公夷臯元年

三十三年王陟

頃王

元年癸卯

六年彗星入北斗○王陟

匡王

元年己酉

六年王陟○晉靈公為趙穿所殺趙盾使穿迎公子黑臀于周立之

定王

元年乙卯

晉成公元年

六年晉成公與狄伐秦獲秦謀殺之絳市六月而蘇

七年晉成公卒于扈

八年

壬戌晉景公元年

十八年齊國佐來獻玉磬紕公之廟

二十一年王陟

簡王

元年丙子

五年晉景公卒

六年

辛巳晉厲
公元年

十三年晉厲公卒○楚共王會宋平公于湖陽

十四年

巳丑晉悼
公元年

王

靈王

元年庚寅

十四年晉悼公卒

十五年

甲辰晉平
公元年

二十七年王陟

景王

元年丁巳

十三年春有星出婺女○十月晉平公卒

十四年

庚午晉昭
公元年

河水赤于龍門二里

十九年晉昭公卒○冬十二月桃李花

二十二年

晉頃王元年

二十五年晉頃公平王室亂立敬王

敬王

元年壬午

八年晉頃公卒

九年

庚寅晉定公元年

十四年漢不見于天

二十六年晉青紅見

二十八年洛絕于周

二十六年淇絕于舊衛

三十九年晉城潁丘

四十三年宋殺其大夫皇瑗于丹水之上丹水

雍不流

四十四年王陟

元王

元年丙寅晉定公卒

二年 晉出公元年

四年於越滅吳

六年晉澮絕于梁丹水三日絕不流

七年齊人鄭人伐衛○王陟

貞定王

元年癸酉於越徙都瑯琊

四年十一月於越于勾踐卒是為莢執次鹿郢

立

六年晉河絕于扈

七年晉荀瑶城南梁 一本出公二十年

十年於越子鹿郢卒不壽立

十一年晉 [REDACTED] 出奔齊

十二年河水赤三日○荀瑶伐中山取窮魚之

丘

十三年晉韓麗取秦武城

十六年 晉出公二十二年

十七年晉出公薨乃立昭公之孫是為敬公

十八年已丑晉敬公元年

二十年於越子不壽見殺是為盲姑次朱勾立

二十二年楚滅蔡

二十四年楚滅杞

二十八年晉敬公十一年王陟

考王

元年敬公十八年魏文侯立

十年楚滅莒

十一年晉敬公卒

十二年晉幽公柳元年魯悼公卒

十四年魯季孫會晉幽公于楚丘

十五年王陟

威烈王

元年丙辰

三年晉大旱地生鹽

五年晉丹水出反潔

六年晉大夫秦嬴賊幽公于高寢之上魏文侯
立幽公子止

七年

壬戌晉烈
公元年

趙獻子城泫氏韓武子都平陽

八年趙城平邑

九年楚人伐我南鄙至于上洛

十一年田公子居思伐邯鄲圖平邑○於越滅
滕

十二年於越子朱勾伐郟以郟子鳩歸

十四年於越子朱勾卒子翳立

十六年齊田盼及邯鄲韓舉戰于平邑邯鄲之
師敗逋遂獲韓舉平邑新城

十七年魏文侯伐秦至鄭還築汾陰郃陽○田
悼子卒田布殺其大夫公孫孫公孫孫以廩丘
叛于趙田布圍廩丘翟角趙孔肩韓氏救廩丘
及田布戰于龍澤田師敗逋

十八年王命韓景子趙烈子及我師伐齊入長垣

二十三年王命晉卿魏氏趙氏韓氏為諸侯

二十四年王陟

安王

元年庚辰

九年晉烈公卒子桓公立韓非子作桓侯

十年己丑晉桓公頃元年

十五年魏文侯卒在位五十年○大風書昏○晉大

子喜出奔

十六年乙未魏武侯擊元年封公子緩

二十一年韓滅鄭哀侯入于鄭

二十三年於越遷于吳

二十六年王陟○魏城洛陽及安邑王垣○七

月於越太子諸咎弒其君翳○十月越人殺諸

咎越滑吳人立李錯枝為君

烈王

元年丙午魏公子緩如邯鄲地名以作難邯鄲趙○

於越大夫寺區定越亂立初無余是為莽安

二年秦胡蘇帥師伐韓韓將韓襄敗胡蘇于酸

水○魏觶諸侯于范臺○晉桓公邑哀侯于鄭

○韓山堅賊其君哀侯

六年辛亥梁惠成王元年韓共侯趙成侯遷晉桓公于屯

留以後更無晉事趙成侯偃韓懿侯若伐我葵鄆城

七年王陟○我師伐趙圍蜀陽○齊田壽帥師

伐我圍觀觀降○魏大夫王錯出奔韓

顯王

元年癸丑鄭城邢丘自此韓改稱曰鄭○秦子向命為

藍君

二年河水赤于龍門三日

三年公子景賈帥師伐鄭韓明戰于韓我師敗

逋

四年夏四月甲寅徙邦于大梁○王發逢忌之
藪以賜民○於越寺區弟思弒其君莽安次無
顛立

五年雨碧于郢地忽長十丈有餘高尺半

六年我師伐邯鄲取列人我師伐邯鄲取肥○
雨黍于齊

七年我與邯鄲趙榆次陽邑○王會鄭釐侯于
巫沙

八年入河水于圃田又為太溝而引圃水瑕陽
人自秦導岷山青衣水來歸

九年秦師伐鄭次于懷○城殷

十年楚師出河水以水長垣之外○龍賈帥師
築長城于西邊○鄭取屯留尚子

十一年鄭釐侯使許息來致地平丘戶牖首垣
諸邑及鄭馳地我取枳道與鄭庶王及鄭釐侯
盟于巫沙以釋它陽之圍歸釐于鄭

十二年魯恭侯宋桓侯衛城侯鄭釐侯來朝○
於越子無顓卒是為莢蠋卯次無彊立

十三年邯鄲成侯會燕成侯于安邑

十四年秦公孫壯伐鄭圍焦城不克秦公孫壯
帥師城上枳安陵山民邯鄲伐衛取漆富兵城
之○齊師及燕戰于洵水齊師遁

十五年齊田期伐我東鄙戰于桂陽我師敗逋
○東周與鄭高都鄭釐侯來朝中陽○宋景鼓

衛公孫倉會師圍我襄陵

十六年王以韓師諸侯帥縣于襄陵○齊侯使

楚景舍來求成○邯鄲之師敗我師于桂陵秦

韓闕與惠成王使趙
師破之不知是何年

十七年燕伐趙圍濁鹿趙靈王及代八救濁鹿

敗燕師于勺晉取玄武濩澤即雷澤
舜漁處

十八年齊築房以為長城

十九年王如衛命公子南為侯

二十年

二十一年魏殷臣趙公孫襄伐燕還取夏屋城
曲逆

二十二年壬寅孫何侵楚人三戶乳禁伐徐州
二十三年魏章帥師及鄭師伐楚取上蔡○孫
何取潁陽○秦孝公會諸侯于逢澤○絳中地
墉西絕干汾

二十四年魏敗韓馬陵

二十五年

二十六年穰疵帥師及鄭孔夜戰于梁赫鄭師
敗逋與齊田盼戰于馬陵

二十七年五月齊田盼及宋人伐我東鄙圍平
陽

九月秦衛鞅伐我西鄙○十月邯鄲伐我北鄙
○王攻衛鞅我師敗逋

二十八年城濟陽○秦封衛鞅于鄔改名曰尚

二十九年邳遷于薛○三月為大溝于北郭以行圃田之水

三十年

三十一年秦蘇胡帥師伐鄭韓襄敗秦蘇胡于

酸水

不知何年附此

三十二年

三十三年鄭威侯與邯鄲圍襄陵

二十四年魏惠成王三十六年改元稱一年○

王與諸侯會于徐州○於越子無疆伐楚

三十五年楚吾得帥師及秦伐鄭圍綸氏

不知何年

附此

三十六年楚圍齊於徐州遂伐於越殺無疆

三十七年

三十八年龍賈及秦師戰于雕陰我師敗逋○

王會鄭威侯于巫沙

三十九年秦取我汾陰皮氏

四十年

四十一年秦歸我焦曲沃

四十二年九鼎淪泗沒于淵

四十三年

四十四年

四十五年楚敗我襄陵

四十六年

四十七年

四十八年王陟

慎靚王

元年辛丑秦取我曲沃平周

二年魏惠成王薨

三年今王元年

四年

五年

六年鄭侯使韓辰歸晉陽及向○二月城陽向

更名陽為河雍向為高平

隱王

史記作胡王名延
蓋赫隱聲相近

元年丁未十月鄭宣王來朝梁燕子之殺公子
平不克齊師殺子之醢其身

二年齊地景長長丈餘高一尺○魏以張儀為
相

三年韓明帥師伐襄丘○秦王來見于蒲坂關
○四月越王使公師隅來獻舟三百箭五百萬

及犀角象齒○五月張儀卒

四月翟章伐衛○魏敗趙將韓舉

五年洛入成周山水大出

六年十月大霖雨疾風河水酸棗○楚庶章帥
師來會我次于襄丘

七年翟章救鄭次于南屈

此年
未的

八年秦公孫爰帥師伐我皮氏翟章帥師救皮
氏圍疾西風

九年城皮氏

十年

十一年

十二年秦拔我蒲坂晉陽封谷

十三年邯鄲命吏大夫奴遷于九原將軍大夫

適子代史皆貂服

十四年

十五年薛侯來會王于金丘○楚人雍氏楚人

敗

十六年王與齊王會于韓○今王終二十年

竹書紀年卷下終



國家圖書館, NATIONAL CENTRAL LIBRARY, TAIWAN, R.O.C.

